

**ISIXHOSA ULWIMI LOKUQALA OLONGEZELELWEYO: IPHEPHA I**  
**ISIXHOSA FIRST ADDITIONAL LANGUAGE: PAPER I**

Ixesha: 2½ liyure

Amanqaku: 100

---

**QAPHELA**

1. Eli phepha linamaCANDELO amane.

ICANDELO A: Izicatshulwa (30)

ICANDELO B: Ushwankathelo (10)

ICANDELO C: Imibongo (30)

ICANDELO D: Ukusetyenziswa kolwimi (30)

2. Phendula yonke imibuzo ngesiXhosa.

3. Funda ngenyameko uze uphendule imibuzo ngokwemiyalelo yayo.

4. Umthamo wempendulo mawukhokelwe ngamanqaku.

5. Qwalasela upelo nolwakhiwo lwezivakalisi.

6. KwiCandelo C **unyanzelekile** ukuba uwuphendule **Umbuzo 3.1**, umbongo ongamiselwanga.

7. Nombola iimpendulo zakho ngokwendlela esetyenzisiweyo kwiphepha lemibuzo.

8. Bhala ngokucacileyo nangokucocekileyo.
-

## ICANDELO A IZICATSHULWA

### UMBUZO 1

Funda ngenyameko ezi zicatshulwa uze uphendule imibuzo.

1.1

#### UBOMI ABUSOLOKO BUYINTO ENYE



- 1 Abazali abaninzi banqwenela ukukhulisa abantwana abaphumelelayo kuyo yonke into abayenzayo. Abantwana mabafundiswe besebancinane ukuba ngamanye amaxesha akukho lula ukuphumelela. Abazali banayo into yokulindela imimangaliso ebantwaneni babo. Umzali uye afune umntwana wakhe athathe ikhondo leziBalo ekubeni yena mzali iziBalo zazimxaka. Abazali bade babakhethela abantwana babo ikhondo amabalilandele. Le ndlela yokulindela izinto ezingummangaliso emntwaneni ayincedi kuba omnye ude abalekele kwiziyobisi.
- 2 Kubalulekile ukuba abantwana bafundiswe ukwahlulelana okanye ukwabelana besebancinane. Kubalulekile ukuba abantwana bafundiswe ngokwabelana kaloku umntu ngumntu ngabantu. Ukufunda ukwabelana nokwahlulelana kwenza ukuba abantwana bakwazi ukumelana neemeko zokuhlala okanye iimeko zokuphila. Kufuneka abantwana bafundiswe ukuba xa benze kakubi balungiswe bohlwaye ukuze xa benze kakuhle banconywe.
- 3 Kukho abantwana abalawulwa ngumsindo ngalo lonke ixesha. Apho bakhoyo aba bantwana kusoloko kuvakala izikhalo. Abanye basoloko becaphukile, befuna ukuhlala bodwa. Maxa wambi baye bathi ngoku behleli nabanye, basuke baqale nje uchuku ubone sekusiliwa kwindawo enabo. Xa umntwana ebonisa ukuba nomsindo nokucaphuka, umzali kufuneka ambonise ngobuchule eyona mpazamo yakhe, endaweni yokumngxolisa. Kubalulekile ukuba umzali abonise uthando novelwano xa umntwana engaphumelelanga kwezemidlalo nalapha ezifundweni. Kaloku ubomi abusoloko buyinto enye buyajika-jika.
- 4 Abantwana mabakhuthazwe ukwabelana nabanye okanye bathethe nabanye ngentlungu abayivayo. Umntwana angancokola nabahlobo bakhe athethe ngokungaphumeleli kwakhe. Oku kuya kwenza ukuba aba babini bakhuthazane

bacebisane. Kufana naxa umntwana enento emvuyisayo, makabelane nabanye abantwana kodwa azigade angaqhayisi. Umntwana makafundiswe umahluko phakathi kokuqhayisela abanye nokwabelana nabanye ngezimvo. Luxanduva lomzali ukumfundisa umntwana lo mahluko.

[Sithathwe kwincwadi- *IsiXhosa ngumdiliya ibanga-12* saze salungiselelwa uFAL ngabakwa-IEB]

## Iglosari

<b>Lunqwenela</b>	Lufuna/lurhalela
<b>Imimangaliso</b>	Imilingo
<b>Zazimxaka</b>	Zazimoyisa
<b>Abalawulwa</b>	Abasoloko
<b>Ngobuchule</b>	Kakuhle

### 1.1.1 Funda umhlathi woku-1.

- (a) Abazali abaninzi banqwenela ukukhulisa abantwana abanjani? (1)
- (b) Umbhali uthi kufuneka bafundiswe ntoni abantwana ngoku basebancinane? (2)

### 1.1.2 Funda umhlathi wesi-2.

- (a) Kutheni kubalulekile ukuba abantwana bafundiswe ngokwabelana? (2)
- (b) Xa abantwana benze kakuhle kufuneka umzali enze ntoni? (1)

### 1.1.3 Funda umhlathi wesi-3.

Umele ukukwenza ntoni umzali xa umntwana wakhe ecaphuka? (2)

### 1.1.4 Funda umhlathi wesi-4.

Umntwana angenza ntoni xa engaphumelelanga kwiminqweno yakhe? (2)

**[10]**

1.2

### INDIMA EDLALWA SISIKOLO KWINGQEQUESHO YOMNTWANA



- 1 Isikolo yindawo enabafundi abaninzi kakhulu. Ezi zikolo zinabafundi abavela kumakhaya ngamakhaya. Banezimilo ngezimilo. Injongo yobukho kwabo ezikolweni yimfundo. Ukuze bayifumane le mfundo kufuneka bahlonele iititshala zabo. Kufuneka babonakalise intlonipho kubantu abadala. Le ntlonipho kufuneka iqale ekhaya. Ekhaya kufuneka babonakalise imbeko nokumxabisa umzali ukuze enze njalo nakwabanye abantu abadala.
- 2 Umntwana oyamkelayo ingqequesho yakowabo uba ngumfundi onesidima othandwayo nazititshala esikolweni. Uthi sele ethunywa zititshala asuke abonakalise uncumo ngalo lonke ixesha. Ingxaki yabantwana bangoku ababahloniphi abantu abadala. Abazihloniphi bona ziqu. Ababakhathalelanga abantu abadala, kuba bazibhubhisa ngeziyobisi. Abangayaziyo yeyokuba ezi ziyobisi zidodobalisa ingqondo. Izinto abaziboni kakuhle. Izinyobisi zibahlutha imbeko nentlonipho. Bayoyikwa ngabazali kuba imali bayazithathela ngenkani kubazali babo ngokukhupha iimela nemipu.
- 3 Nasezikolweni abazihloniphi iititshala bathetha unothanda kuzo. Abayenzi nemisebenzi yesikolo beza nje esikolweni bezokuchitha imini. Umntwana othe wayithobela ingqequesho akabi nangxaki yokuziphatha kunye nokusebenzisana nabanye abantu.

[IsiXhosa ngumdiliya ibanga 11: N. Bokoloshe no Z. Konza]

#### 1.2.1 Funda umhlathi woku-1.

- (a) Yintoni injongo yobukho babafundi ezikolweni? (1)
- (b) Kufuneka abafundi benze ntoni ukuze bayifumane imfundo? (2)

1.2.2 Funda umhlathi wesi-2.

- (a) Chaza ukuba umntwana oyamkeleyo ingqeqesho yakowabo uba ngumfundi onjani. (2)
- (b) Bazibhubhisa ngantoni abafundi? (2)

1.2.3 Funda umhlathi wesi-3.

- (a) Bhala izinto zibe mbini ezibonakalisa ukuba abafundi abazihloniphi iititshala zabo. (2)
- (b) Umbhali weli nqaku uthi umntwana othe wayithobela ingqeqesho akabi nangxaki yezinto ezimbini. Bhala ezi zinto zimbini zibhalwe apha kwisicatshulwa. (2)

[11]

1.3

**UTHANDO LUPHILA APHA!**



Ibali likaSalamina (36) noTshepho Howza Mosese (36).

Esi sibini sadibana ngo-2006 kwaye baneminyaka eli-11 betshatile. Banomntwana omnye oyintombazana. USalamina ukhulelwe uza kuba nomntwana wesibini.

1 Ukuqala kobuhlobo babo

Badibana kufoto luka*Backstage* uHowza eze kudlala indima yokuba ngumfundi kaSalamina. Ku*Backstage* uSalamina wayedlala njengotishala(*lecturer*) yedrama. USalamina wayevela kubuhlobo nenye indoda ngoku wayengekafuni ukuthandana. USalamina wayengafuni ukuthandana nemvumi kodwa wabona indlela uHowza azimisele ngayo emsebenzini wakhe. Uthi wayazi ngaloo mini ukuba uHowza uya kuhlala ekhona ebomini bakhe njengomhlobo.

2 Izifundo abazifundileyo

Bangejana unyaka phambi kokuba batshate. Ngeli xesha bakha ubudlelwane obusekelwe kubuhlobo kunye nokuhloniphana. UHowza wacela umtshato ngo-2007

emva kokuba bethandane iinyanga ezimbalwa. BabeseKapa. UHowza wayenexhala ngobo busuku kodwa uSalamina wavuma ukumtshata. Basoloko bekunye.

3 Umtshato wabo

Bazakhela ubomi obuhle kunye. UHowza uyavuya ukuba uphila ubomi obuhle nomhlobo wakhe osentliziweni. Baneshishini lokucebisa imitshato. UHowza ufuna nokuseka i*Foundation* kwezempilo nezemfundo. Bafunda ukuba emtshatweni kufuneka umntu aqeqesheke, afunde ukuba yintoni emonwabisayo. UHowza ufuna ukukhenketha ihlabathi kunye nabantwana babo ababini. USalamina uyonwaba xa bekhenketha. Bafunda ukukhula njengabavelisi befilim ne-TV nokuba ngoosomashishini. Bathi umtshato ngumdaniso, ngamanye amaxesha uSalamina uyakhokela kwaye ngamanye amaxesha uHowza uyakhokela, kodwa basoloko besebenza kunye.

[Esi sicatshulwa sivela kwiBona ka-Apreli 2011]

1.3.1 Funda umhlathi woku-1.

- (a) UHowza noSalamina badibana phi? (1)
- (b) USalamina wayedlala eyiphi indima? (1)

1.3.2 Funda umhlathi wesi-2.

- (a) Bangejana ixesha elingakanani phambi kokuba batshate? (1)
- (b) Wacela umtshato ngawuphi unyaka uHowza? (1)
- (c) Babusekelwe kwintoni ubudlelwane babo? (2)

1.3.3 Funda umhlathi wesi-3.

- (a) Nika iiFoundation afuna ukuziseka uHowza. (2)
- (b) Chaza ukuba uHowza noSalamina bafunda ntoni emtshatweni. (1)

[9]

**30 amanqaku**



## ICANDELO B USHWANKATHELO

### UMBUZO 2

Funda esi sicatshulwa singezantsi uze usishwankathele ngawakho amazwi.

#### QAPHELA:

- Bhala amagama angama-50 ukuya kwangama-60 ukubonisa ukuqonda.
- Bhala ingongoma ibeNYE kwisivakalisi ngasinye.
- Ungabhala izivakalisi **ezihlanu ezinomthamo. OKANYE**
- Umhlathana.
- Isivakalisi okanye ingongoma nganye mayiqale ngesenzi.
- Bhala phantsi inani lamagama owasebenzisileyo ezantsi kwesishwankathelo.

#### AMANDLA EZIYOBISI



UThemba imbaleki eyaziwayo eMdantsane yayivuka ekuseni iziqhelanise nokubaleka. Le mbaleki yayibaleka yenze imijikelo elishumi kwistediyam kusasa nasemalanga. Ukuziqeqesha kwakuyinto ayithanda kakhulu uThemba. Oku kuxakeka kungaka wayekwenza kuba elungiselela ugqatso olukhulu lweembaleki olwaluza kubanjelwa eKapa. UThemba wayesaziwa kakhulu ngabantu kwaye wayethandwa.

Xa sele usondela loo mnyhadala waziva eyilungele loo mini ebekade eyilindele. Abazali bakaThemba babevuya kakhulu ngempumelelo yonyana wabo. Babefuna ukumbona kumabonakude nakumaphephandaba. Amalungiselelo ohambo lukaThemba aye enziwa ngabazali bakaThemba. Bona abazali bakaThemba babeza kuqala ukuthatha uhambo olude oluya eKapa.

Le mbaleki yaya eKapa ngenqwelomoya, abazali bona bamkhapha behamba ngemoto entsha. Kaloku unyana wabo wayesele eneemali aziphumeleleyo. Indlela ababevuya ngayo yayingenakubaliswa. Endleleni eya eKapa abazali bakaThemba babevuyela into yokuba beza

kuhlala kweyona hotele intle iGarden Court Holiday Inn. Uvuyo ababenalo kwakungekho nto ingenye encokolwayo ngaphandle kwempumelelo yonyana wabo. Bafika eKapa bonke ngexesha elifanelekileyo.

Phambi kokuba kuqalwe ugqatso, uThemba waxilongwa ngoogqirha, watsalwa negazi. Igazi lakhe lafunyanwa linesiyobisi. Olu hlobo lwesiyobisi luthi lumnike umntu amandla angummangaliso okubaleka, aluphumelele ugqatso. UThemba uthi wazithatha ezi ziyobisi kuba efuna ukuluphumelela ugqatso. Ubuhlungu kukuba akazange avunyelwe ngabaphathi ukuba alungenele ugqatso. Kwanyanzeleka ukuba angavunyelwa ukuba abaleke akhutshwe.

Abazali bakhe, umqeqeshi wakhe kunye nabantu abasondeleyo kuye bahlupheka kakhulu sesi senzo sibi kangaka. Bayibona le nto ikukuzama indlela yokuba umntwana wabo angalungeneli olu gqatso. Kwakhona babona ukuba yindlela yokungcolisa igama likaThemba. Abaphathi baye babonisa abazali bakaThemba iingxelo ezivela koogqirha. Kwanyanzeleka ke ukuba babuyele ekhaya bedanile.

[IsiXhosa ngumdiliya ibanga-11: M. Mdliva no N. Mtsotsoyi nabanye]

**10 amanqaku**



## ICANDELO C ISIOHBE

Phendula yonke imibuzo esetwe kwimibongo.

### UMBUZO 3

#### UMBONGO ONGAFUNDISWANGA

3.1 Funda lo mbongo ungezantsi uze uphendule imibuzo elandelayo.

##### UBULUMKO: N. Mdekazi

- 1 Sisiseko sokuphila  
Sisiseko sobomi  
Onabo akaxakwa  
Usoloko ephethe amacebo.
- 2 Bubangela impumelelo  
Ngamaxesha onke.  
Amaqhwaba obomi awahlali kuba  
Usoloko exakekile esebenza.  
Wakuxakwa ukhangela indlela.  
Onabo akajonganga nto inye  
Ingqondo nentliziyo ayilali.  
Ngamaxesha obumnandi uyayazi indlela elungileyo.  
Ngamaxesha obubi akahlali athi khunubembe  
Usoloko efumbathe ikrele lokuphila.
- 3 Mawethu ubomi esibuphilayo bufuna ubulumko.  
Zininzi izinto ezinokusenza siphelelwe lithemba.  
Kufuneka sizifundise ukuba nobulumko.  
Ube nendlela yokwenza ngamaxesha onke.  
Ukuze siphile ubomi obude.

#### Iglosari:

<b>Amaqhwaba</b>	lingele/ ubunzima/ iingxaki
<b>Efumbethe</b>	Ephethe/ ebambe
<b>Khunubembe</b>	Akhedame/ adane/ aphelelwe lithemba

3.1.1 Funda isitanza soku-1.

- (a) Umbhali uthi ubulumko sisiseko santoni. Nika izinto zibe mbini. (2)
- (b) Umntu onobulumko usoloko ephethe ntoni? (1)

3.1.2 Funda isitanza sesi-2.

- (a) Ubulumko bubangela ntoni? (1)
- (b) Chaza ukuba kutheni amaqhwaba obomi engahlali kumntu onobulumko? (1)

- (c) Caphula umqolo/umgca othetha into enye nale ntetho:  
"Ingqondo nentliziyo yakhe icinga ngalo lonke ixesha" (2)
- (d) Umntu onobulumko uye enze ntoni ngamaxesha obubi. (1)

3.1.3 Funda isitanza sesi-3.

- (a) Umbhali uthi kufuneka ntoni kubomi esibuphilayo. (1)
- (b) Yintoni ekufuneka umntu ayenze ukuze abe nobomi obude? (1)

**[10]**

**IMIBONGO EFUNDISIWEYO**

3.2 Funda lo mbongo ungezantsi uze uphendule imibuzo elandelayo.

**UBOMI: T. Skuni**

- 1 Ndingathetha ndithini mawethu?  
Ndingabalisa ndithini miDak'akowethu?  
Ngento eyingxaki nenkohla  
Into ebumnandi buphela okwencindi yekhala
- 2 Namhlanje yile, ngomso yileya.  
Namhlanje uyahleka, ngomso uyalila.  
Nguphantsi phezulu, nguquluk'ubhode  
Bunjalo ubomi.
- 3 Ubomi bunjengenkungu.  
Ubomi bunjengamafu  
Buyajikeleza, abuhlelanga ndawonye  
NguHambabhekile, sukhulala ndawonye.
- 4 Ubomi bufun'unyamezelo.  
Ubomi bufun'ukucengwa.  
Kuba ekunyamezeleni kukho umvuzo.  
Bunjalo ke ubomi.
- 5 Qinani maqhawe namaqhawekazi eAfrika  
Masibalekele phambili neAfrika yethu,  
Akulahlwa mbeleko ngakufelwa  
Kakade ubomi ngumzamo.

3.2.1 Funda isitanza soku-1:

- (a) Nika **isixhobo sokubonga** esisetyenziswe yimbongi kule  
miqolo mibini yokuqala. (1)

- (b) Caphula umgca/umqolo othetha into enye nale ntetho:  
"into enzima kakhulu engenaso isisombululo." (1)
- (c) Bhala **isifaniso** esisetyenziswe yimbongi. (1)
- (d) Xa ucinga ingaba incindi yekhala ivakala njani emlonyeni?  
Khetha impendulo kwezi:
- (i) imuncu
  - (ii) iyakrakra
  - (iii) iswiti
- (1)

3.2.2 Funda isitanza sesi-2:

Nika **isixhobo sokubonga** esisetyenziswe yimbongi kumqolo wesi-3. (1)

3.2.3 Funda isitanza sesi-3:

- (a) Imbongi ibufanisa nantoni ubomi? Nika izinto zibe mbini. (2)
- (b) Caphula umgca/umqolo apho imbongi isebenzise **isikweko**. (1)

3.2.4 Funda isitanza sesi-4:

Shwankathela ngawakho amazwi okuthethwa yimbongi kwesi sitanza. (2)  
**[10]**

3.3 Funda lo mbongo ungezantsi uze uphendule imibuzo elandelayo.

**UMNTWANA WESIKOLO: T. Matoto**

- 1      Mhle eyintombi,  
         Mhle eyinkwenkwe,  
         Mhle ehluphekile,  
         Mhle onwabile.  
         Ngokuba ngumntwana wesikolo.
- 2      Wonwabile ehamba,  
         Wonwabile efunda,  
         Wonwabile ebonakala,  
         Wonwabile efihlakele.  
         Ngokuba usela ulwazi.
- 3      Ungxamel' ulwazi,  
         Ugxanyel' ukwazi  
         Unxanel' ulwazi,  
         Uxhinel' ulwazi.  
         Ngokuba luyimpilo ulwazi.
- 4      Uquqel' ulwazi,  
         Agqugqise ngolwazi,

	Aziqikaqike kulwazi, Eziqeqesha ngolwazi. Ngokuba luyamxhobis' ulwazi.
5	Ukhula ngolwazi, Ukhunjulwa ngokwazi, Akhutshulwe kukwazi, Akhankanywe ngokwazi. Ngokuba luyaphilis' ulwazi.

3.3.1 Funda isitanza soku-1.

- (a) Nika **isixhobo sokubonga** esisetyenziswe yimbongi kwesi sitanza? (1)
- (b) Bhala iimeko zibe mbini ezixelwe kumgca/kumqolo wesi-3 nowesi-4 apho abonakala emhle kuzo umntwana wesikolo. (2)

3.3.2 Funda isitanza sesi-2.

Umbhali uthi umntwana wesikolo uziva njani xa efunda? (1)

3.3.3 Funda isitanza sesi-3.

- (a) Nika injongo yokuba umntwana wesikolo aye yonke imihla esikolweni. (1)
- (b) Umbhali uthi ulwazi luyintoni? (1)

3.3.4 Funda isitanza sesi-4.

Caphula imiqolo ibe mibini ebonisa indlela azithanda ngayo iincwadi azifundayo esikolweni nendlela aziphumelela ngayo ezo zifundo. (2)

3.3.5 Funda isitanza sesi-5.

Cacisa, ubeke ngawakho amazwi okuthethwa yimbongi kumqolo wokuqala nowesibini. (2)

**[10]**

**30 amanqaku**

## ICANDELO D UKUSETYENZISWA KOLWIMI

### UMBUZO 4

Bhala kwakhona ezi zivakalisi zingezantsi uze usebenzise **isihlanganisi** esifanelekileyo. Khetha kwezi:

**Ukuba, kodwa, ukuze, xa**

4.1 Funda iincwadi zakho ... upase.

4.2 UNancy undixelele ... uyagula.

4.3 Siyasifunda esi isiXhosa ... asisipasi.

**[3]**

### UMBUZO 5

Bhala kwakhona ezi zibizo zingezantsi zibe kwisandiso.

5.1 Umzali.

5.2 Indlu.

5.3 Ilitye.

**[3]**

### UMBUZO 6

Bhala kwakhona esi sivakalisi singezantsi kula maxesha alandelayo:

Intombi zibhaka izonka ezimnandi ngeKrismesi.

6.1 Kwixesha elizayo.

6.2 Kwixesha elidlulileyo.

6.3 Kwixesha eladlulayo.

**[3]**

### UMBUZO 7

Gqibezela le tshati njengoko ubonisiwe:

Umntu	wonke	Ngumntu	obalulekileyo
Izikolo	zonke	7.1	ezibalulekileyo
Amahashe	7.2	Ngamahashe	abalulekileyo
Ilizwe	lonke	Lilizwe	7.3

**[3]**

### UMBUZO 8

Bhala kwakhona ezi zivakalisi uze ufakele **izifanekisozwi**.

Khetha kwezi:

dyumpu, krwe, qhwa, saa.
--------------------------

8.1 Yachitheka iswekile yathi ... phantsi.

8.2 UJohn wambetha uDavid wamthi ... ngempama.

8.3 Ihempe yam ibomvu ...

[3]

### UMBUZO 9

Bhala kwakhona ezi zivakalisi zibe **kwisixando sokwenziwa/kwisenziwa**:

9.1 Isisu siyandiluma.

9.2 Utata uqhuba imoto.

9.3 Inja ibambe isela.

[3]

### UMBUZO 10

Bhala kwakhona ezi zivakalisi zingezantsi uze unike **isichasi** segama elikrwelwe umgca ngaphantsi.

10.1 UWendy ngumntwana omkhulu.

10.2 ULucky unxibe ibhulukhwe embi.

10.3 Ndihamba indlela emfutshane xa ndisiya esikolweni.

[3]

### UMBUZO 11

Bhala kwakhona ezi zivakalisi **kwimo elandulayo**:

11.1 Sidiniwe.

11.2 Ngamadoda la.

11.3 Umama wathunga ihempe katata.

[3]



### UMBUZO 12

Bhala kwakhona ezi zivakalisi **kwingxelo-ntetho**.

12.1 USharon: "Yhu! Abantu ababini bonzakele."

12.2 Umama: "Shelly, vula iradiyo."

[2]

### UMBUZO 13

Bhala kwakhona ezi zivakalisi uze ulungise igama elibiyelweyo ukuze ivakale intetho yakho.

13.1 Amakhwenkwe acula (sebenza).

13.2 Sibona abantwana besikolo (toyi-toya).

[2]

### UMBUZO 14

Bhala kwakhona ezi zivakalisi uze wakhe **isalathandawo** ngala magama abiyelweyo.

14.1 Abazali baya (intlanganiso) kule veki izayo.

14.2 Siza kuhlamba impahla (umlambo) ngoMgqibelo.

[2]

<b>30 amanqaku</b>
--------------------

**Ewonke amanqaku: 100**